


Y GLÖYN BYW.

CIP AR BETHAU TAN YR
WYNEB.

CHWARAE UN ACT.

Gan T. Gwynn Jones.

DREFNEWYDD:
THE "WELSH OUTLOOK" PRESS,
8, BROAD STREET.



891.662
J72g

ALL RIGHTS RESERVED.

Am fanylion a thelerau ymfyner a'r—

CYHOEDDWYR,

"Welsh Outlook,"

8, Broad Street,

Drefnewydd.

p46538

Y GLÖYN BYW.

(Cip ar bethau tan yr wyneb.)

CYMERIADAU:

| | |
|--------------|-----------------------|
| MERFYN OWEN |Artist. |
| GWLADYS OWEN |Gwraig Merfyn. |
| MISS JONES |Modryb Gwladys. |
| JOHN MORGAN |Dyn busnes. |
| MARGED |Geneth o forwyn. |

Amser: Yr oes hon. Lle: Ty Merfyn Owen yn
Nhreweilgi. Digwydd popeth yn ystod un diwrnod.

*Ystafell yn nhŷ Merfyn Owen. Lle tân ar ganol y
pared, yn wynebu'r gynulleidfa. Drws i fyned allan
ar y chwith; ffenestr rhyngddo â'r pared pellaf.
Piano ar y dde i'r lle tân, a'i chefn at y pared. Drws
arall ar y dde i fynd i'r gegin. Dwy gadair esmwyth,
un o bobtu i'r lle tân. Bwrdd brecwest ar ganol y
llawr. Lluniau ar y parwydydd. Papurau a llyfrau
ar dop y piano ac ar lawr. Basged bapur wast rhwng
y piano a'r drws i'r gegin, a honno yn fwy na llawn.
Cyfyd y llen gan ddangos Merfyn a Gwladys yn
bwyta eu brecwest.*

GWLADYS : Y mae'r postmon yn hwyr iawn heddyw.

MERFYN : Goreu yn y byd. Yr wyf i wedi blino ar filiau i frecwest.

GWLADYS : Wel, beth a wyddoch na ddaw â hanes cwsmer i chwi?

MERFYN : Cwsmer? Dim perigl fy nghariad i!
(*Mewn ton hwyliog*) Fydd pethau felly ddim yn digwydd yn y byd sy'r awr hon—

GWLADYS : O, rhag cywilydd i chwi, Merfyn—dynwared ych tad fel yna o hyd!

MERFYN : Ar "y byd sy'r awr hon" yr oedd y bai fy nghariad i. Ond dywedyd yr oeddwn i na bydd cwsmeriaid ddim yn—ddim yn dyfod gyda'r post, na chyda dim arall. Yr wyf i wedi hen roi'r goreu i ddisgwyl am bethau felly. Yn wir, mi welaf bellach mai fy nhad druan oedd yn iawn. Mi wneuthum gangymeriad ofnadwy—

GWLADYS (*yn oeraidd*) : O, yn wir? Beth oedd hwnnw?

MERFYN : Dysgu trin paent—hynny ydyw, paent fel hyn (*gan estyn ei fys at un o'r lluniau*). Ni fedraf i yn fy myw roi paent ar fy ngeiriau, a dyna lle y methais i (*mewn ton hwyliog eto*) ie, siwr, fy mhobl i, y paent! y paent fy mhobl i!

GWLADYS : O, Merfyn, Merfyn!

MERFYN : Digon gwir fy nghariad i. Ond pe bawn i wedi dysgu trin paent mewn ffordd haws, buasai yn well i mi—dysgu paentio drysau a ffenestri, llidiardau, certi, a— a gwalltiau merched! gweini—

GWLADYS : O, Merfyn! Yr ydych yn rhy gas!

MERFYN : Wel, mi sylwais fod gwallt Marged yn rhyw fath o felyn ddoe, cyn belled ag y gwn i rywbeth am liwiau. Yr wyf yn credu mai lliw llygoden.—(*Gwladys yn rhoi ysgrech ac yn hel ei dillad at ei gilydd*)—Yr wyf yn credu mai lliw llygoden ydyw erbyn heddyw. Ac er nad oes nemor gamp arnaf i fel artist, yr wyf yn ddigôn hy i gredu y gallsw'n baentio 'i gwallt iddi yn wastatach o leiaf am ryw hanner coron—

(*Curo ar y drws*).

GWLADYS : Tewch, Merfyn, da chwithau. (*Yn uwch*)
Dowch i mewn !

(*Marged yn dyfod i mewn, yn dod i bwndel o llythyrau ar y burdd yn ymyl Merfyn, ac yna yn myned ymaith. Rhai o'i phapurau cyrlïo gwallt yn syrthïo wrth iddi fynd*).

MERFYN : Yn awr ynteu, a welsoch chwi'r lliw ? Rhywbeth rhwng melyn a choch a du a llwyd ydyw, cyn belled ag y gwn i—

GWLADYS : O twt, lol ! Edrychwch ar y llythyrau, a gadewch lonydd iddi hi a'i gwallt—hi pia fo.

MERFYN : Ie, diolch am hynny (*mewn ton hwyliog*) o drugaredd yn yr hen fyd yma ! Ond y llythyrau, ynteu. O'r goreu. (*Y mae'n edrych ar yr amlenni*) Dyma un i chwi. (*Yn ei estyn iddi, ac yn dechreu agor ei rai ei hun*). Bil y teiliwr—dyma'r seithfed tro iddo gymryd y drafferth, druan. (*Yn edrych un arall*). Bil y miliner, am y fased ddillad honno—hynny ydyw, am yr het fach glws honno a gawsoch chwi. Dyma'r pumed tro iddi hithau ddifetha papur. Ad inc. A stamp. (*Un arall*). Bil y glo. Rhaid bod ganddynt ddigon o amser i'w golli—dyma'r pedwerydd

cynnyg. (*Un eto*). Bil y groser—yr ail. Wel y mae hwn ar ddechreu ei yrfa (*gyda hwyf*) yn y byd helbulus hwn!

GWLADYS (*yn codi ei golwg oddiar ei llythyr*): H'm! Y mae fy modryb yn dyfod heddyw—

MERFYN: Fo'n gwarchod! Pa fodryb?

GWLADYS: Modryb Elin—hyhi a roes y piano i ni—yn hytrach, hyhi a roes ddeugain punt i ni brynu piano, fel y gwyddoch yn dda, Merfyn.

MERFYN (*yn edrych ar lythyr arall*): A dyma lythyr oddiwrth bobl y siop fiwsig yn dwedyd bod dyn yn dyfod i fynd â'r piano i ffwrdd heddyw am na thalwyd mo'r arian oedd yn ddyledus ddechreu'r mis diwedda—

GWLADYS: O, Merfyn, peidiwch â dywedyd y fath beth!

MERFYN: Y mae'n ddrwg gennyf orfod dywedyd, ond dyma lythyr y cnafon i chwi, ynteu (*yn ei estyn iddi*).

GWLADYS (*yn edrych arno*): O, wel, wel, beth a wnawn ni bellach? (*Yn tŷri i wylo*). Dyma hi ar ben arnom o'r diwedd!

MERFYN (*yn cyfodi ac yn ei hanwesu*): Yn awr, Gwladys fach, peidiwch âg wylo fel yna. Ni fedraf i ddim dioddef eich gweled!

GWLADYS: Ond beth a wnawn ni? Os dont i ymosyn y piano cyn i'm modryb gyrraedd, beth a ddywedwn ni? A phe baent yn dyfod a hithau yma, dyna hi yn waeth fyth! Byddai raid i ni gyfaddef y cwbl—ein bod wedi gwario'r deugain punt i fynd am y mis mel, yn lle talu am y piano! O, beth a wnawn ni? (*Yn wylo*).

MERFYN: Wel, peidiwch âg wylo, beth bynnag. Mi ddyfeisiwn rywbeth yn union deg.

GWLADYS : Ond yr wyf i wedi blino ar ddyfeisio a dyfeisio pethau o hyd ac o hyd i'w dywedyd wrth bobl !

MERFYN : Felly finnau hefyd, mi rof fy ngair i chwi ! Ond gan na fynnant luniau, rhaid iddynt gymryd esgusion !

GWLADYS : Yr ydych yn cymryd popeth yn ysgafn, Merfyn ! Fyddwch chwi byth o ddifrif !

MERFYN : Dim perigl i mi gymryd pobl o ddifrif a hwythau yn fy nghymryd innau o fregedd ! Prynant hwy luniau gennyf i, ac mi dalaf innau eu biliau iddynt hwythau. Y mae hynny yn deg.

GWLADYS : Ond ni waeth heb siarad fel yna. Rhaid i ni wneud rhywbeth heb law siarad.

MERFYN : Rhaid, y mae'n wir. Ond pa peth ?

GWLADYS : Wn i ddim.

MERFYN : Na minnau !

GWLADYS : Pa faint oedd i'w dalu am y piano y mis diweddaf ?

MERFYN (*yn edrych ar y llythyr*) : Pedair punt—

GWLADYS : Pedair punt ? Wel, dylem fedru cael cymaint a hynny rywsut—

MERFYN : Am y mis diweddaf, a phedair am y mis cynt—

GWLADYS : O, Merfyn, 'does bosibl !—

MERFYN : Feddylwn fod, fy nghariad i. A phedair am y mis cyn hynny.

GWLADYS : O, drugaredd fawr ! dyna ddeuddeg punt.

MERFYN (*yn cyfrif ar flaenau ei fysedd*) : Y mae'n gas gennyf ffigyrau fel y gwyddoch. Ie, deuddeg.

GWLADYS : A pha faint yr ydym wedi eu talu eisoes?

MERFYN : Dim ceiniog, gobeithio, gan fod yn rhaid iddi fynd!

GWLADYS (*gan darawo ei throed yn y llawr*) : Ond ni wiw iddi fynd! Beth a ddywedwn ni wrth fy modryb?

MERFYN : Wel, arhoswch funud—(*gan ystyried*)—dywedyd nad ydym eto wedi trawo ar biano wrth ein bodd—

GWLADYS : A hithau wedi bod yma ddeufis yn ol, ac wedi gweld hon!

MERFYN : O, fu hi? Nid oeddwn i yn cofio hynny. Wel, ni thal y celwydd yna ddim, felly. Wn i ddim beth a ddywedwch, os na rowch gynnyg ar y gwir am unwaith—

GWLADYS : O, Merfyn! (*yn wyllo*).

MERFYN : Gwladys fach, maddeuwch i mi. Nid oeddwn yn meddwl dywedyd dim byd cas, nag oeddwn yn wir. Yr wyf wedi cellwair cymaint i geisio fy mherswadio fy hun na waeth gennyf pa beth a ddigwyddo, fel yr wyf wedi mynd i ddywedyd pethau heb ystyried. Dowch, dyna eneth dda. Rhaid i ni wneud rhywbeth, wrth gwrs.

GWLADYS (*gan sychu ei llygaid*) : Wel, mi af at fy nghyfnither i edrych a fedr hi ddim rhoi benthyg deuddeg punt i ni—ni fedraf i feddwl am ddim arall.

MERFYN : Ie. Da iawn. Dyna eneth dda. Mi af innau at y cebyst gan Smith yna, i edrych a fedraf gael rhywfaint ganddo ar y lluniau hynny a adewais yn ei siop.

GWLADYS : O'r goreu. Mi ddywedaf wrth Marged beth i'w wneud. Rhaid i ni fod yn ein holau cyn canol dydd yn sicr.

MERFYN : Rhaid, achos bydd pobl y piano yma yn union ar ol deuddeg o'r gloch.

GWLADYS : A bydd fy modryb yma cyn hynny, y mae'n debyg !

(Cyfyd y ddau ac ant allan drwy ddrws y gegin. Daw Marged i mewn gan glirio'r llestri a thaclu'r ystafell. Y gloch yn canu ar y chwith. Marged yn rhedeg i'r drws, ac yn dyfod yn ei hol, a Miss Jones i'w chanlyn.

MISS JONES : Ac wedi mynd allan y mae Mrs. Owen felly ?

MARGED : Ie, ma'm. Mi aeth allan yn gynarach nag arfer heddyw, ac mi ddywedodd wrthyf y byddai yn ei hol yn union deg. Fydd hi ddim yn arfer mynd allan mor gynnar.

MISS JONES : O. Ac i ba le yr aeth Mr. Owen, ynteu ?

MARGED : Yr ydw i yn credu mai allan yr aeth yntau hefyd. Ni ddywedodd o ddim wrthyf i ble'r oedd o yn mynd, dim ond peri i mi, os doe yma ryw wr bonheddig i holi amdano, ofyn i hwnnw fod mor garedig a galw eilwaith, neu ynte aros hyd nes y doe o yn ei ôl.

MISS JONES : Wel, ni welais i erioed beth rhyfeddach na bod y ddau wedi mynd allan fel hyn, a minnau wedi gyrru i ddywedyd fy mod yn dyfod. Wrth gwrs, mi gyrhaeddais yma yn gynt nag yr oeddwn yn disgwyl fy hun. Ac y mae arnaf eisiau bwyd. A fydddech chwi cystal a gwneud cwpaned o de i mi ?

MARGED : Ar unwaith ma'm, wrth gwrs.

(*Marged yn mynd i'r gegin. Miss Jones, yn tynnu ei phethau, yna yn edrych o't chwmpas. Yn mynd at y piano, ac yn canu darn bach o fwsig arni. Yna yn codi ac yn edrych ar y dodrefn a'r lluniau ar y parwydydd, a'r papurau hyd y cadeiriau ac ar lawr. Yn codi ei hysgwyddau ac yn ucheneidio ac ysgwyd ei phen. Yn eistedd ac yn synfyfyrio a'i llaw dan ei gên. Yn codi ac yn cerdded o gwmpas drachefn, ac yn eistedd eilwaith. Marged yn dŷfod â the a bara ac ymenyn i mewn, ac yn eu doddi ar y bwrdd. Miss Jones fel pe heb sylwi bod Marged yno o gwbl, yn dal i synfyfyrio.*)

MARGED : Dyna'r te, ma'm, os gwelwch yn dda.

MISS JONES (*fel pe buasai'n deffro*) : O, diolch i chwi ! (*Yn symud at y bwrdd*).

MARGED : Dacw'r gloch, os bydd arnoch eisiau rhywbeth arall, ma'm.

MISS JONES : O, diolch i chwi ! (*Marged yn cychwyn i ffwrdd*). Arhoswch funud. Ers pa faint yr ydych chiwi yma ? Yr wyf yn credu fy mod wedi eich gweled pan oeddwn i yma ryw ddeufis yn ol ?

MARGED : Do, ma'm. 'Rydw i hefo Mrs. Owen er pan ddaethon nhw i fyw i'r ty yma gyntaf.

MISS JONES : O, da iawn. Yr ydych yn fodlon ar eich lle felly ? Y mae'n anodd cael merched i aros yn hir yn yr un lle yn awr.

MARGED : O, ydw, ma'm, yn ddigon bodlon ar fy lle. Mae Mrs. Owen yn garedig dros ben, yn gadael i mi fynd allan pan fynwyf. Ac y mae Mr. Owen mor garedig, mor

ddigri a llawen bob amser—ni chefais i erioed air croes ganddo. Wyddwn i ddim cyn dwad yma fod pobl 'run fath a nhw i'w cael.

MISS JONES : Y mae'n dda gennyf glywed hynny. Y mae Mr. Owen yn gweithio yn galed onid yw?

MARGED : Y galed iawn ma'm. Mae ganddo le i weithio, yn nhop y ty, stiwdio y mae o yn i alw. Welsoch chi 'rioed y fath le—yn llawn o bob math o bethau. Mae yno sgerbwd dyn—digon i roi braw i chi !—a lluniau o bob math; hen gleddyfau a dillad a llestri—fedra i ddim deyd wrthych, ma'm, gymaint o bethau sydd yno. A dyna lle bydd o drwy'r dydd. Mae o wedi paentio cannoedd o luniau o Mrs. Owen, mi gymraf fy llw, mewn pob math o ddillad, ac heb ddillad o gwbl, weithiau a'i gwallt i lawr, fel aur o'i chwmpas hi. O! mae hi'n glws hefyd! Ac y mae o wedi paentio fy llun innau yn fy nillad gwaith—'dydw i ddim yn deyd bod hwnnw yn glws, ond mae o yr un ffunud, welsoch chi 'rioed beth mor fyw ydi o—mi fasech yn disgwyl iddo siarad a chi. Mae Mr. Owen yn deyd y ca i hunnw pan fydda i yn mynd i 'mhriodi, a'i fod o am wneud un arall i mi yn fy nillad goreu hefyd, ma'm. Yn wir, mae o wedi dechreu eisoes, mi fyddaf yn gorfod eistedd iddo fo.

MISS JONES : Felly yn wir. Wel, y mae'n sicr fod Mr. Owen yn ennill arian mawr, gan ei fod mor brysur o hyd?

MARGED (*gan ysgwyd ei phen*) : Deyd y bydd o, ma'm, y base'n llawer gwell iddo fod yn labrwr nag yn baentiwr. Nid yw pobl yn leicio 'i baent o, medde fo—ond ni welais i ddim byd clysach erioed.

MISS JONES : O, pam, tybed, nad ydynt yn leicio 'i baent o?

MARGED : Wn i ddim, ond mi clywais o'n deyd y base fo'n gwneud yn llawer gwell 'tase fo wedi dysgu paentio â'i dafod. 'Rœddwn i wedi synnu, achos wyddwn i ddim fod neb yn medru paentio â'u tafodau, ac mi ddywedais hynny wrtho. "O, oes, Marged," medde fo, "mae'r paent yn fwy llyfn felly, a phobol yn ei leicio fo yn well. Ond, dda gen i ddim blas paent ar fy nhafod, dyna'r drwg." Ac wedyn, dyma fo yn chwerthin, ac yn cydio am ganol Mrs. Owen, a gwneud iddi ddawnsio ar ganol y llawr yma. O! un digri ydi o!

MISS JONES : Wel, feddyliwn i mai e! Yr ydych yn forwyn werthfawr iddynt, ac y mae'n sicr eich bod yn cael cyflog da.

MARGED (*gan ysgwyd ei phen*) : Wel, ma'm, y cytundeb oedd fy mod i gael y peth ofynnais i, ond, welwch chi, ma'm, o achos nad ydi pobol—y ffyliaid gwirion iddyn nhw! —ddim yn leicio paent Mr. Owen, mae'n anodd iddo fo bob amser dalu yn i bryd. Ond waeth gen i am hynny. 'Rydw i yn cael pob peth fel hwythe yn union, ac os bydd amaf eisie ychydig arian i rywbeth, mi caf nhw, ac ni fydd Mrs. Owen byth yn son amdany'n nhw wedyn, nac yn eu tynnu nhw o'r cyflog pan fydda i yn cael hwnnw chwaith. Ac 'rydech chi'n gweld, ma'm, yr ydw inne yn leicio'r ffordd y mae nhw yn byw, a'r canu a'r dawnsio a'r chwerthin a'r pethe digri a'r pethe clws. Hwyrach fy mod i yn wirion, ond mi fydde'n well gen i fod yma am ddim na chael cyflog mawr mewn rhai lleoedd y gwn i amdanynt, lle na chaiff rhywun barch mwy na phe tae o gi ac na welwch chi ddim byd clws ddydd mewn blwyddyn!

MISS JONES : Wel, wel. Hwyrach mai chwi sydd yn iawn yn wir. Peth ardderchog ydyw bod yn hapus ac yn fodlon. Diolch i chwi.

(Marged yn mynd allan, a Miss Jones yn synfyfyrïo ac yn sipian y te yn araf. Y drws yn agor yn ddistaw, a rhywun yn edrych i mewn, yna yn oilio yn ei ôl yn sydyn, heb i Miss Jones ei weled. Miss Jones yn cyfodi ac yn cychwyn at y drws. Marged yn dyfod i mewn yn sydyn i'w chyfarfod, ac yn cau'r drws ar ei hôl).

MARGED : Wn i ar y ddaear beth i'w wneud ma'm, os maddeuwch i mi am ddwad atoch chi fel hyn.

MISS JONES : Beth sydd?

MARGED : Wel, mi ddaeth rhyw ddyn dieithr at y drws, a holi am Mr. Owen. Dywedais innau nad oedd i mewn, a'i fod wedi peri i mi ofyn i rywun a allai alw i holi amdano fod cystal a galw eilwaith, neu ynte aros hyd nes doe o yn ei ôl. Dyma'r dyn gofyn i mi a oedd yma biano yn y ty. Dywedais innau fod, yn y rwm yma. Daeth yntau at y drws yn syth, ond caeodd ef yn sydyn drachefn. Ac y mae o yrwan yn sefyll yn y lobi, ac ni wn i ar y ddaear beth i'w wneud ag o, ma'm.

MISS JONES : A oes yma ddim ystafell arall y gallech ei droi iddi i aros?

MARGED : Wel, oes, ma'm, ond, nid oes—rydym ar ganol glanhau, fel tae, ac y maent yn o annhrefnus, felly, i gyd ond hon, ma'm.

MISS JONES : O, wel, os ydyw yn ddyn a golwg parchus arno, dowch ag ef i mewn yma, wrth gwrs—nid oes gennyf i ddim yn erbyn.

MARGED : Diolch yn fawr i chi, ma'm.

(*Marged yn myned ymaith. Miss Jones yn myned ac yn edrych ar y piano, yn enwedig ar enw'r gwneuthurwyr, yna yn mynd ac yn eistedd i lawr, gan godi ei hysgwyddau ac ucheneidio. Y drws yn agor, a Morgan yn dyfod i mewn. Miss Jones yn cyfodi ac yn ei wynebu.*)

MORGAN (*gan grymu ei ben*): Esgusodwch fi ma'm, am aflonyddu arnoch fel hyn—

MISS JONES (*gan ymgrymu*): Peidiwch â son. Am weled Mr. Owen yr oeddych chwithau, y mae'n debyg?

MORGAN: Ie, ma'm. Yr oedd y forwyn yn dywedyd na byddai 'n hir, ac y mae'n bwysig i mi ei weld rhag blaen.

(*Ennyd o ddistawrwydd. Cyfyd Morgan ac a at y piano. Rhed ei fysedd hyd-ddi. Eistedd ar yr ystôl, a chân ryw ychydig farrau o fiwsig yn ysgafn.*)

MISS JONES: Yr ydych yn hoff o fiwsig syr?

MORGAN: Ydwyf, ma'm, yn hoff iawn. Ac y mae hon yn biano ardderchog hefyd, onid yw?

MISS JONES: Ydyw.

(*Dechreu Morgan ganu'r piano drachefn, yn ysgafn ac yn araf. Gwrendy Miss Jones yn astud arno, gan guro'r amser â blaen ei throed.*)

MISS JONES: Ah! diolch i chwi, syr. Ni chlywais i mo'r miwsig yna ers llawer blwyddyn!

MORGAN: Wel, na minnau chwaith. Wn i ddim pa beth a barodd i mi ei gofio, os nad rhyw ddamwain yn y peth a genais gyntaf. Ac wedi i mi ddechreu wel,—(*Chwardd yn rhyw hanner trist*). Rhaid i chwi f'esgusodi am chwerthin, ond ni fedrwn i yn fy myw beidio.

MISS JONES : Popeth yn iawn. Daw miwsig â phob math o bethau i gof dyn, oni ddaw?

MORGAN : Pob math. Mi welaf eich bod chwithau 'n deall miwsig, ma'm.

MISS JONES : Ychydig. Mi fyddwn gynt yn hoff ryfeddol o ganu ac o'r piano hefyd.

MORGAN : Wel, mi ddylwn esbonio i chwi pam y chwerddais innau. Pan oeddwn yn hogyn, yr oeddwn innau yn hoff iawn o ganu—o gystadlu, felly. Un tro, yr oedd côr o honom wedi mynd i Eisteddfod y Glyn, fel y gelwid hi, ac yr oedd cystadleuaeth ar ganu'r ddeuawd yna. (*Miss Jones yn plygu ei phen i wrando*). Galwyd enwau'r cystadleuwyr, ond nid oedd neb yn ateb dros un cwpl. Galwodd yr ysgrifennydd yr enwau drachefn. Neb yn ateb. "Well i ni gynnyg?" meddwn innau wrth y ferch oedd yn eistedd o'm blaen—y soprano oreu yn ein côr. "Ie," meddai hithau, gan chwerthin—un lawen oedd hi. "Ydi'r cwpl arall yma bellach?" ebe'r ysgrifennydd. "Yma!" meddwn innau. Ac felly, i fyny yr aethom, a chanasom a chawsom y wobr. Ond wedi hynny, dyma'r rhai a gurwyd yn clywed nad oeddym ni wedi danfon ein henwau i mewn, ac yn gwrthdystio yn erbyn rhoi'r wobr i ni. Wedi cryn helynt barnwyd fod yn rhaid i ni droi'r wobr yn ei hôl, am fod yr amodau yn ein herbyn. Felly fu, ond yr oedd y gynulleidfa o'n plaid, a rhoes y cadeirydd wobr arbennig i ni.

MISS JONES : Doniol iawn! (*gan syllu arno*). Ac felly, John Morgan yw eich henw chwi?

MORRGAN (*gan gyfodi*) : Fo'n gwarchod! Nid Elin Jones sydd yma?

MISS JONES (*gan gyfodi*): Ie!

MORGAN (*yn estyn ei law*): Wel, ar fy ngair—cynt y cyferfydd dau ddyn na dau fynydd. Ni welais i byth monoch ar ol y diwrnod hwnnw. (*Ysgydwant ddwyllaw yn galonnog*). Euthum i ffwrdd i'r America, fel y gallai eich bod yn cofio, yn union deg wedyn.

MISS JONES: Ydwyf, yr wyf yn cofio.

MORGAN: A dyma chwi—wel, erbyn sylwi, rhaid i mi ddywedyd nad ydych wedi altro cymaint, ond bod eich gwallt wedi troi ei liw, fel fy ngwallt innau. Wel, y mae'n dda gennyf eich gweled, yn wir.

MISS JONES: Fel yr oeddych yn canu'r piano daeth y cwbl yn ol i'm cof innau, ond ni feddyliais ddim unwaith mai chwi oedd yna hyd nes i chwi ddechreu dywedyd yr hanes.

MORGAN: Wel, yn wir, peth rhyfedd yw bywyd! Nid wyf yn meddwl i mi weled neb o'r hen gartref o'r dydd hwnnw hyd y funud yma. A pha beth yn y byd a barodd i mi ganu'r dernyn yna ar y piano?

MISS JONES: Pwy ŵyr?

MORGAN: Ie, pwy ŵyr! Clywais ddarlithiwr yn America yn dywedyd fod greddf dyn yn ateb i filoedd o fân bethau na ŵyr ei ymwybod ddim yn y byd amdanynt.

MISS JONES: Digon tebyg. Pwy ŵyr?

MORGAN (*yn fyfyrgar*): Ie, pwy ŵyr! Ond ym mha le yr ydych yn byw—yn yr hen gartref o hyd?

MISS JONES : Nage. Yr wyf yn byw yn Llundain ers blynyddoedd, ond fy mod yn digwydd bod yng Nghymru ers tro, ac wedi dyfod yma i edrych am fy nith cyn mynd yn f'ôl.

MORGAN : Mrs. Owen—a yw hi yn nith i chwi?

MISS JONES : Ydyw, merch Dafydd fy mrawd.

MORGAN : Dyn byw! Dafydd eich brawd—hen gyfaill. Llawer tro digrif a ddigwyddodd iddo fo a minnau. A yw Dafydd yn fyw o hyd?—mi garwn ei weled.

MISS JONES : Nag ydyw—wedi ei gladdu ers blynyddoedd, druan.

MORGAN : Felly yn wir, y mae'n chwith gennyf feddwl. Ni chlywswn i ddim o'r hanes. Wrth gwrs, ychydig amser sydd er pan ddeuthum i adref o'r America, wyddoch (yn fyfyrgar) A! yr hen amser gynt!

(Curo ar y drws o'r gegin).

MISS JONES : Dowch i mewn!

(Marged yn dyfod i mewn, a golwg cynhyrfus arni).

MARGED : Maddeuwch i mi ma'm. Mae rhyw ddynion wrth y drws yn holi am—am—am ryw Mr. Morgan—

MISS JONES : Ie—

MORGAN : O, myfi yw hwnnw. Yr wyf yn meddwl y gwn beth yw eu neges—yr oeddwn wedi sôn wrthynt fy mod yn mynd i alw heibio i Mr. Owen. Esgusodwch fi funud, Miss Jones, mi af atynt.

MISS JONES : Wrth reswm, Morgan.

(Morgan yn myned allan. Marged yn cychwyn ar ei ôl).

MISS JONES : Marged !

MARGED : Wel, ma'm.

MISS JONES : Dau funud ! Dywedwch y gwir wrthyf yn awr—raid i chwi ddim ofni, cofiwch, ond dywedwch y gwir plaen wrthyf.

MARGED : Ie ma'm, wrth gwrs—debyg iawn—mewn ffordd o siarad—fel tae—

MISS JONES : Beth yw'r helynt ? Dywedasoch wrthyf fod Mr. Morgan—y dyn a aeth allan yn awr—wedi gofyn i chwi a oedd yma biano yn y ty ?

MARGED : Do, ma'm—o leiaf, felly y deallais i—

MISS JONES : Wel, pwy sydd wrth y drws yn awr ?

MARGED : Dau ddyn, ma'm, yn holi am Mr. Morgan.

MISS JONES : Rhywbeth arall ?

MARGED (*yn edrych yn gymysglyd*) : Wel, ma'm, fel tae—mi welwch—hynny ydi, ma'm—mae'n rhaid i mi ddeyd, mae'n debyg. Deyd yr oedden nhw, ma'm, eu bod wedi dwad, ma'm, i nôl y piano, ma'm, os gwelwch yn dda.

MISS JONES : O, mi welaf. Diolch i chwi, Marged. Gellwch fynd yn awr, ac ni raid i chwi boeni dim eich bod wedi dywedyd i gwir wrthyf i.

MARGED : Diolch i chi, ma'm. (*Yn myned*).

MISS JONES (*wrthi ei hun, gan godi ei dwylaw*) : Wel, wel ! Yr oeddwn i yn ofni, yn wir !

(*Morgan yn dyfod yn ei ôl. Miss Jones yn sylly arno*).

MORGAN: Maddeuwch i mi am eich gadael chwi. Y mae gennyf ryw ddynion dylach na'r cyffredin yn fy ngwasanaeth. Daethant yma ar f'ôl i holi, yn lle gwrando pan oeddwn yn dywedyd wrthynt pa beth i'w wneud.

MISS JONES: Ai siop fiwsig sydd gennych, Morgan?

MORGAN: Ie, siwr—dyna fy mhethau hyd heddyw, welwch chwi.

MISS JONES: Ac yn eich siop chwi, y mae'n ddiameu, y prynodd Mr. a Mrs. Owen y piano yna?

MORGAN: Ie, siwr, ac un o'r rhai goreu ydyw hefyd. A chawsant hi yn rhad. (*Yn tynnu ei oriau, ac yn edrych arni*). Yn wir, Miss Jones, y mae hi yn tynnu at amser cinio, a rhaid bod rhywbeth yn cadw Mr. a Mrs. Owen. A roech chwi'r anrhydedd ar eich hen gydymaith gynt o ddyfod i ginio gydag ef? Y mae acw le gweddol gysurus, digon o fwyd plaen, digon o offer cerdd a miwsig; a phob croeso. Byddai'n bleser anghyffredin gennyf pe doe, yn wir.

MISS JONES: Wel, diolch yn fawr i chwi, Morgan. Ni waeth i mi heb ddisgwyl yn y fan yma am wn i. Dont yn eu holau cyn y nos hwyrach. A bydd yn hyfryd cael sôn am yr hen amser, oni bydd?

MORGAN: Bydd, yn wir. A! Yr hen amser gynt! Eisieu bod yn fawr oedd arnom y pryd hwnnw, onid e, ond erbyn hyn—yr hen amser gynt!

(*Cyfyd Miss Jones a gwisg ei phethau. Egyr Morgan y drws iddi, ac ant allan gyda'i gilydd. Daw Marged i mewn, edrych o'i chwmpas, a at y piano ac edrych arni fel pe bai beth byw; ysgydwai ei phen a chwyd ei dwylaw, gan adael iddynt ddisgyn yn glec ar ei*

ffedog. Yna, dechreuwa glirio'r burdd. Cenir y gloch. Rhed Marged allan drwy ddrws y gegin. Daw Merfyn i mewn drwy'r llall. Saif ar ganol y llawr, gan wthio ei ddwyllaw i waelod pocedi ei lodrau. Rhydd gic i'r fasged bapur oni bo'n rholio ar lawr; teifl ei gap ar ei hól, ac eistedd i lawr ar gadair wrth y tân, gan godi ei draed ar ymyl y fantell, a thanio sigaret. Daw Gwladys i mewn o'r gegin, a chwlm o flodau yn ei llaw).

MERFYN: Gwladys! dyna flodau tlysion! Ble y cawsoch hwy?

GWLADYS: Yn siop Edwards—dau swllt oeddynt. Ac mi ddaethoch o'm blaen i.

MERFYN: Do, fy ngeneth i, yr wyf i yn sicr o ddyfod yn f'ól fel arian drwg!

GWLADYS (*yn eistedd gyferbyn ag ef, gan dynnu ei het a'i menig*): Wel, a gawsoch chwi rywfaint?

MERFYN: Dim ceiniog goch, wrth gwrs. A'r catffwl gan Smith yna—mi allwn ei saethu fo!

GWLADYS: Pam? Beth a wnaeth o?

MERFYN: Wel, dim; cafodd gynyg decpunt am un or pictiwr, a gwrthododd y ffwl gwirion ei werthu am na chai bymtheg amdano, fel yr oeddwn i wedi dywedyd wrtho.

GWLADYS: Ond, beth a wnai 'r dyn, a chwithau wedi dywedyd pymtheg wrtho?

MERFYN: O, y penbwl ganddo, dylasai wybod y buaswn yn falch o ddeg—o bump—ie, o bum swllt! O! mi af yn labrwr, myn f'enaid i! Yr wyf wedi darfod â'r busnes yma! Dim chwaneg o baent i mi!

GWLADYS : Dowch, yn awr, Merfyn, ni thâl peth fel yna ddim—

MERFYN : Mi dâl yn well na'r busnes sy gennyf i, beth bynnag ! Sut y daeth hi ymlaen gyda chwi, ynteu ?

GWLADYS : O, yn ofer, wrth gwrs. Nid oedd gan fy nghyfnither ddim ond ychydig arian gwynion yn y ty, ac ni ddaw'r gwr adref tan yr wythnos nesaf.

MERFYN : Dyna'r hwch drwy'r siop yma ynteu. Ond (*gan godi ar ei draed ac edrych o'i gwmpas yn syn*) ni chofiais i ddym byd—

GWLADYS : Cofio beth ?

MERFYN : Ond eich modryb ! Dylasai fod yma cyn hyn.

GWLADYS : Wel, dylasai yn sicr ! Yr oeddwn innau wedi anghofio. Tybed a fu hi yma, a mynd i ffwrdd am nad oeddym i mewn ? Un go lew yw'r hen fodryb, calon iawn ganddi—buasai'n ddrwg gennyf—

MERFYN : Ble mae Marged ? Dylai hi fod yn gwybod, os daeth eich modryb at y drws.

GWLADYS : Wn i ddim. Nid oedd hi yn y gegin pan ddeuthum i i mewn. Gobeithio nad oedd hi ddim wedi mynd allan a bod fy modryb wedi galw a neb yn ateb. Mi af i edrych amdani yn awr.

(*Gwladys yn mynd. Merfyn yr cerdded o gwmpas yn anesmwyth, yn edrych ar y piano ac ar y naill beth a'r llall yn yr ystafell. Gwladys yn dyfod yn ei hôl*).

MERFYN : Onid yw hi yna ?

GWLADYS : Na, 'does dim golwg arni.

MERFYN : Popeth o chwith !

GWLADYS : Popeth o chwith !

MERFYN : Wel, aed popeth yn yfflon ynteu !

GWLADYS (*yn ddifrif*) : Merfyn, fy machgen i, pa beth a wnawn ni ? Yr ydym wedi chwarae fel dau löyn byw ddigon o hyd !

MERFYN : Digon gwir, Gwladys fach. Ond cofiwch, yr wyf i wedi cymryd arnaf fy mod yn ddidaro ugeiniau o weithiau pan fyddwn i yn llawer parotach i eistedd i lawr a thorri fy nghalon.

GWLADYS : Mi wn hynny, fy machgen i, bellach—yr wyf yn dechreu deall ; ond dylasem fod wedi meddwl am y pethau hyn yn gynt.

MERFYN : Dylasem, hwyrach. Ond beth a wnaem ni ? (*Yn synfyrffio, a'i law ar ei dalcen*) Gwladys, a yw'n edifar gennyf ?

GWLADYS : Am ba beth ?

MERFYN : O ! am y cwbl ! Mi ddodais ormod o baent ar y llun, mi wn !

GWLADYS : Beth yw dy feddwl di ?

MERFYN : O ! wyt ti ddim yn cofio am y ty bychan hwnnw yn y wlad, briallu cochion, botwm gwr ifanc, balchder Llundain a chenin Pedr yn tyfu ar y lawnt ; coeden

ywen o flaen y ty, a mainc yn ei chysgod, dau bren rhosyn, un o bobtu i'r drws, a rhosynnau bach cochion arnynt, O, Gwladys! A'r lluniau oedd yn mynd i werthu cyn gynted ag y medrwn i eu paentio, a bywyd yn mynd i fod yn haf ar ei hyd—yr holl wagedd melyn y buom yn byw arno gynt?

GWLADYS (*gan fyned ato, a doddi ei dwylaw ar ei ysgwyddau*): Merfyn! O, Merfyn!

MERFYN (*gan ymaflyd am ei chanol a'i chodi oddiar lawr*): Gwladys!

GWLADYS: Wyt ti'n deall bellach?

MERFYN (*yn drist ac undonog*): Ydwyf, fy nghariad, yr wyf i yn deall.

GWLADYS: Ac eto, y mae'n gas gennyf dy weled ti mor trist. Ni welais i erioed monot ti fel hyn o'r blaen, Merfyn!

MERFYN: Naddo. Pan fyddit ti yn cysgu y byddwn i yn cael rhyw byliau fel hyn—

GWLADYS: O, Merfyn, pe taswn i yn gwybod!

MERFYN: Y mae'n ddrwg gennyf dy fod ti wedi dyfod i wybod. Yr oeddwn yn gobeithio y gallwn ddal ati fel glöyn byw nes bod yr haul wedi tywynnu arnom. Ond yn awr, dyma fo yn mynd i lawr heb dywynnu, a'r byd i gyd yn llwyd ac yn oer. A gwae'r glöyn byw!

GWLADYS (*gan edrych ym myw ei lygaid*): Merfyn! un waith, a'r olaf—gresyn na buasai yma rywun wrth y piano! Yn awr, ynteu!

(*Estyn ei llaw iddo, a dawnsiant ar ganol y llawr am ennyd. Safant yn sydyn. Gollynga Gwladys ei gwallt yn gawod aur dros ei hysgwyddau, cofleidia Merfyn hi. Yna safant gar edrych ar ei gilydd*).

MERFYN: O, Gwladys!

GWLADYS (*gan godi ei gwallt*): Dyna'r ddau löyn byw wedi darfod! Yn awr, Merfyn, gwrando! (*Tyn gadwyn oddiam ei gwddf*). Dos a hon i'w gwerthu—na, ni chei di ddim mynd. Mi af a hi fy hun—fy lle i ydyw mynd. Cawn ddeuddeg punt amdani, beth bynnag—y mae hi yn werth mwy na hynny—petae ddim ond y garreg.

MERFYN: Na, ni chei di ddim mynd, Gwladys. Melltith ar y byd i gyd! na chei! Paid, dyro hi am dy wddw yn ôl, Gwladys, Gwladys! (*Gan geisio ei rhwystro*).

GWLADYS (*gan ei wynebu'n dawel*): Merfyn, nid wyf i wedi gwneud dim byd er pan briodwyd ni, dim ond prynu pethau fel hyn, hyd yn oed heddyw ddiwethaf yn y byd! (*gan gydio yn y cwlwm blodau ac ysgoi i'w taflu i'r tân*).

MERFYN: Gwladys! (*gan gydio yn ei braich*). Paid, paid! Edrych ar liw hwn!

GWLADYS (*gan eu doddi yn ôl ar y burdd*): Ie, druain bach! Ond, gwrando, nid wyf i wedi gwneud dim, a thithau'n gweithio bob dydd. Nid wyf yn hoffi ymadael â'r hen gadwyn, y mae'n wir—y mae hi'n dlws, ac yn hen. Ond y mae un peth gwell gennyf na'r cwbl.

MERFYN: Beth yw hynnw?

GWLADYS : Tydi ! Weli di, mi werthaf y mân dlysau yma i gyd, ac mi gawn glirio pethau felly, a dechreu o ddifrif wedyn. Ac hwyrach y cawn ni hyd i'r ty bychan hwnnw wedi'r cwbl ! Pwy ôyr ?

MERFYN : Na chawn byth ! Breuddwyd oedd !

GWLADYS : Eistedd di i lawr yn dawel—paid â dywedyd gair—dim un gair ! Yn awr, rhaid i mi gael fy ffordd fy hun y tro yma. Hwda, tyrd yma ! (*Merfyn yn mynd ati, hithau yn dal ei hwyneb i fyny ato*). Dyro gusan i mi, neu ynteu i hon (*gan ddal y gadwyn i fyny*). Yn awr, a wyt ti'n deall ? (*Merfyn yn ei chusanu ar ei thalcen, ac yn mynd ac yn eistedd ar y gadair a chuddio ei wyneb â'i ddwylaw*). Ni byddaf i ddim yn hir, Merfyn !

(*Dyd Gwladys y gadwyn o'i llaw ar y silff, dyd ei het am ei phen, heb edrych ar Merfyn, a rhed allan drwy'r drws ar y chwith heb gofio'r gadwyn. Gyda'i bod wedi mynd, egyr y drws ar y dde, a daw Miss Jones a John Morgan i mewn yn ddistaw. Ni chyfyd Merfyn mo'i ben. Edrych y ddau arno. A Miss Jones ata yn araf, a dyd ei llaw ar ei ysgwydd. Ni chwyd yntau mo'i olwg*).

MISS JONES : Merfyn !

MERFYN (*yn neidio ar ei draed yn sydyn*) : O ! (*Gan rubio ei lygaid*).

MISS JONES : A ydych yn sal, Merfyn ? Y mae golwg wael amoch, fy machgen i.

MERFYN (*gan dynnu ei law dros ei dalcen*) : Wn i ddim. Na, 'rwy'n well, yn well o lawer—yn iawn, yn wir.

Wedi blino, wedi rhyw hanner cysgu. Teimlo dipyn yn hurt Maddeuwch i mi. (*Tynn ei gadach poced allan, pesycha, a sych ei wefuscu unwaith neu ddwy. Gwelir marciau cochion ar y cadach poced*). Eisteddwch, ma'm. Eisteddwch, syr. Y mae'n ddrwg gennyf. (*Pesycha*).

MISS JONES : Ble y mae Gwladys :

MERFYN : Wedi mynd allan ar neges. Bydd yn ei hôl yn union deg. Y mae'n ddrwg gennyf, fy modryb, os buoch wrth y drws a neb yn ateb. Bu raid i ni fynd allan ein dau, ac fel y digwyddodd, cawsom ein cadw yn o hir cyn dyfod yn ôl—

MISS JONES : O, na phoenwch am hynny ; digwyddais daro ar Mr. Morgan, sy'n hen gydnabod i mi, a chefais ginio gydag ef. Buom yn son am yr hen amser, onid do, Morgan?

MORGAN : Do, yn wir, ac yn cofio hen ganeuon—ni chefais i gymaint o bleser ers blynnyddoedd lawer !

MISS JONES : Wel, na minnau chwaith, dywedyd y gwir. Felly, ni raid i chwi boeni dim, Merfyn. Yr wyf yn gobeithio bod Gwladys yn iach—

(*Egyr y drws ar y chwith yn sydyn*).

GWLADYS (*yn rhedeg i mewn*) : Ble y mae'r gadwyn, Merfyn? (*Gwel Miss Jones a Morgan*) O ! O ! 'modryb !

(*Safant gan edrych bob un ar ei gilydd am ennud. Gwladys yn sychu ei llygaid, a Merfyn yn pesychu*).

MISS JONES : Beth sydd wedi digwydd? Y mae rhywbeth o'i le amoch eich dau, goeliaf i?

(*Distawrwydd. Gwladys a Merfyn yn edrych ar ei gilydd*).

MORGAN (*yn dawel*) : Eisteddwch Mrs. Owen. Eisteddwch Mr. Owen. Eisteddwch chwithau, Miss Jones. Yr wyf meddwl fy mod yn deall yn awr, ac mai myfi, os caf ddywedyd hynny, yw'r goreu i siarad am y tro. (*Eisteddant*). Mr. Owen, mi gredaf fy mod yn gweled drwy'r paent bellach, ac y mae'n ddrwg gennyf na welsw'n yn gynt. Sut bynnag, y mae'n dda gennyf ddywedyd wrthych fod Smith wedi gwerthu pump o'ch pictiwr's am bris da y prynhawn yma. A dyma'r papur hwnnw y buom yn son amdano'r dydd o'r blaen (*gan estyn darn o bapur iddo*)—y mae'n sicr eich bod yn cofio—y mae'n ddrwg gennyf na chawsech ef yn gynt.


MERFYN (*yn edrych ar y papur, yn codi ar ei draed, yn troi ei olwg at y piano, ac yna yn edrych yn graff ar Morgan*) : Morgan! (*gan estyn ei law iddo. Ysgydwant ddwyllaw*). Gwladys, edrych! (*Rhydd y papur iddi*). Wn i ddim pa beth sydd wedi digwydd, na pha beth i'w ddywedyd!


GWGLADYS (*wedi edrych ar y papur*) : Wel, nid wyf innau yn deall y cwbl yn iawn, ac y mae geiriau yn sw'nio'n wag, rywfodd! . . . Ond, Merfyn, dyma'r haul yn tywynnu ar y glöyn byw eto! (*Yn cydio a'i llaw chwith yn ymyl ei gwisg, ac yn dal ei llaw ddeheu at Merfyn*). Yn awr, ynteu! Unwaith eto!


MORGAN (*gan darawo ei ddwyllaw yn ei gilydd*):
Campus! (*Llithra at y piano, dechreuwa ganu cainc fywiog,
gyflym, troella Gwladys a Merfyn o gwmpas ar ganol y
llawr, saif Miss Jones i edrych arnynt, gan sychu ei llygaid,
a gwelir Marged yn nwrs y gegin yn edrych yn synn*).

[LLEN].











3 0112 073152438